

explicarint legem Decalogi, doctrinam de pœnitentia, *Symbolum* quod *Apostolicum* vocatur, & *Dominicam precatorem*, antequam acciperet in manus libros Mosis & Prophetarum enucleandos.

Hanc methodum seruauit Dominus, cū summam suarum legum, quas postea fusè per Moysen explicauit, duabus tabulis, decemque præceptis, complexus est. Hanc eandem Christus secutus est, cū legis summam duobus præceptis, dilectione scilicet Dei & proximi: & summam Euangelii, prædicatione pœnitentiæ, & remissione peccatorum comprehendit, & docuit. Hanc postea & Patres tam Græci, quàm Latini, imitati sunt, quorum alii certos quosdam locos diligenter pertractarunt, alii summam etiam omnium locorum communium cōplexi sunt, vt Theod. ἐπιτομὴν θεῶν δογματικῶν. Augustinus Enchiridio ad Laurentium, item de fide ad Petrum.

Ergo de hac docendi methodo dubitandum non est, quin eadem nobis quoque sit imitanda. Cū verò necessaria sit hæc tradendorum ante omnia locorum communium, tanquam primorum principiorum ratio, hinc perspicuū est, quod id in omnibus tradendis artibus solitum est fieri, siquidē nullæ artes, nullæve disciplinæ rectè tradi, vtiliterve percipi possunt, nisi prius iaciantur & explicentur fundamenta, quæ prima vocantur cuiusq; artis principia. Sic Grammaticæ præcepta & principia primò docentur pueri, antequam ad Ciceronis aliorumve autorum lectionem admittantur. Sic in Dialecticis, sic Mathematicis, sic deniq; in Philosophicis & aliis scientiis omnibus fieri consuevit.

Id